

Kedudukan Kadi Dalam Zaman Sahabat

Kadi Wajib Mempunyai Tiga Sifat

“Dua kadi masuk neraka dan satu kadi masuk syurga: iaitu seorang kadi yang mengetahui akan perkara yang hak, lalu ia menghukumkan dengan itu, maka ialah masuk syurga, dan seorang kadi lagi mengetahui akan perkara yang hak, lalu ia berlaku zalim dengan sengaja; dan (seorang kadi lagi) menghukum dengan tidak ada pengetahuan, maka keduanya, masuk neraka.” - maksud hadis nabi, Riwayat al-Hakim.

Saidina “Umar Ibnu al-Khaṭṭāb, seorang khalifah yang terkenal adil, dan sangat bijak timbangannya mengenai muslihat ramai dan sangat keras pula sikapnya dalam menjalankan hukum dan undang-undang Islam. Banyak jasanya dalam dunia Islam dan negeri-negeri yang bukan Islam, sehingga musuh-musuh Islam banyak yang memuji tentang keadilannya.

Dalam zaman Saidina ‘Umar, kadi-kadi mempunyai kedudukan yang tinggi sekali, iaitu dihormati oleh bagin dan diberi kebebasan dengan sepenuhnya dalam menjalankan hukum-hukum Islam. Dengan demikian, maka kadi-kadi tidak menaruh perasaan takut atau gentar berhadapan dengan manusia yang bagaimana pun juga tinggi pangkatnya dalam menjalankan hukum-hukum Allah, sementelah pula hukum-hukum itu sendiri melarang perbuatan membeza-bezakan corak dan pangkat orang.

Dalam menjalankan hukum-hukum Allah, kadi-kadi menyamaratakan segala darjah dan pangkat manusia, tidak ada pandang memandang, pilih memilih, apalagi memakan suap. Siapa sahaja yang melanggar hukum-hukum Islam, walaupun dari golongan orang-orang besar atau hartawan, bahkan walaupun ia putera atau khalifah sendiri, terus sahaja dikenakan hukuman yang sepadan, dan barang siapa yang benar maka ia

akan dibenarkan walaupun ia hamba tebusan.

Penghargaan Saidina ‘Umar terhadap kadi sangat patut dipuji, sehingga rakyat merasa puas hati dengan hukumnya, dunia Islam aman damai, dan tersiar keadilan dalam kalangan rakyat dan dalam kalangan orang-orang besar, sehingga sifat-sifat: zalim, kejam, buas dan ganas, tidak sanggup lama berada pada zamannya. Sifat Saidina ‘Umar yang sangat terkenal, iaitu dengan tidak bertangguh lagi daripada mengambil hak si lemah yang dirampas oleh si kuat sehingga si lemah tadi menerima haknya, atau lebih tegas kita katakan, hak yang teraniaya diambil dari tangan si zalim, walaupun si zalim itu kaum kerabat baginda atau puteranya sendiri, demikian pula walau si yang teraniaya itu musuh yang sebesar-besarnya.

Bagi memegang jawatan kadi Islam yang akan menjalankan hukum Islam di antara umat Islam, baginda cari dan pilih orang-orang Islam yang mempunyai tiga sifat: **warak, takwa, dan mengerti betul-betul akan hukum-hukum Islam.**

Bagi menjamin supaya hukum-hukum dapat dijalankan dengan seadil-adilnya, baginda bereikan kebebasan seluas-luasnya kepada mereka itu, dan menjauhkan sejauh-jauhnya segala

ketakutan kepada orang-orang besar negeri, dan juga dari kekuasaan baginda dan ancamannya, supaya dengan itu, kadi-kadi itu berani menghukumkan orang yang bersalah, walaupun dari tingkatan mana juga, berani menegaskan kebenaran dan berani pula mengambil hak si lemah yang dirampas oleh si kuat.

1. Kadi yang bersifat warak

Supaya tidak keliru meletakkan sifat-sifat yang tiga itu pada tempatnya, maka eloklah dijelaskan di sini kedudukannya yang sebenar.

Erti “warak” sebagaimana yang diterangkan di dalam kamus, ialah menjauhkan diri dari segala syubahat (yakni perkara yang tidak terang halnya) kerana takut akan terjerumus ke jurang yang haram. Kalau yang syubahat, orang takut menghampirinya, maka yang haram lebih patut lagi dijauhkan. Seorang kadi yang telah mempunyai sifat warak tidak akan muh melanggar larangan Tuhan, walaupun yang sekecil-kecilnya. Kalau ia menerima sesuatu perkara atau seseorang yang mesti dikenakan hukuman, maka diperiksanya dengan teliti, dengan menghabiskan tenaga, fikiran dan ikhtiarnya, supaya jangan terdapat kesalahan dalam hukumnya dan supaya hukumnya itu dijalankan dengan seadil-adilnya menurut undang-undang Islam.

Oleh kerana “warak” itu ada yang tulin dan ada yang palsu, maka mustahak juga diterangkan di sini yang palsunya, supaya orang tidak keliru. Adapun warak yang tulin ialah sebagaimana yang telah diterangkan tadi, dan warak palsu sudah bukan warak lagi namanya.

Contohnya, misalnya seorang kadi yang menjauhkan segala perkara atau perbuatan syubahat, tetapi perkara yang haram dilanggarnya.


Kadi yang warak yang dipilih oleh Saidina ‘Umar,

ialah kadi yang jujur setia menjalankan hukum Islam terhadap segala tingkatan manusia dengan seadil-adilnya, dengan tidak membeza-bezakan golongan dan tingkatan.

Beginilah sifat kadi yang berbahagia dan soleh, yang Tuhan janjikan syurga balasannya. di dunia hidup disukai rakyat dan di akhirat diterima segala amal dan hukumnya dengan diberikan pahala yang tidak ternilai.

2. Kadi yang bersifat takwa

Sifat kadi yang kedua, iaitu takwa. “Takwa” ertinya ialah “bakti” kepada Tuhan dengan menjalankan segala perintahnya dan menjauhkan



Agama Islam telah diisyiharkan menjadi agama rasmi negara Persekutuan Tanah Melayu yang telah berjaya mencapai kemerdekaannya pada 31 Ogos 1957. Oleh itu jangan berlenggah lagi daripada memasuki barisan persahabatan “Ikhwan” yang bercita-cita dan sedang berusaha mengembangkan Islam dan kebudayaannya.

segala larangannya, yang besar atau yang kecil.

Dalam menjalankan hukum agama terhadap segala tingkatan, kadi yang bersifat takwa itu, sentiasa ingat akan kemurkaan Allah kalau sekiranya ia berlaku zalim dalam mengenakan hukum itu, dan ia akan merasa berdosa besar kalau ia belum dapat membela si lemah dar penganiayaan si kejam buas, dan tidak pula ia takut dan gentar mengambil hak orang yang teraniaya dari orang yang zalim, kerana tidak ada yang ditakuti olehnya selain Allah.

Takwa yang palsu, ialah yang takut melanggar larangan manusia, tetapi tidak takut melanggar larangan Allah.

3. Kadi yang mengerti hukum Islam

Adapun sifat kadi yang ketiga, ialah mengerti betul-betul akan hukum-hukum Islam, bukan mengerti kulitnya sahaja, sedang isi, maksud dan tujuannya tidak diketahui. Dengan pengertian yang betul-betul terhadap agama, dapatlah seseorang meletakkan hukum pada tempatnya, dan tidak khuatir akan berlaku kesalahan dan kerosakan.

Kadi-kadi dalam zaman Saidina ‘Umar, dipilih dari orang-orang yang ahli betul tetang agama, iaitu yang luas pengetahuannya tentang Quran dan hadis. bukan hanya terhenti kepada mengetahui perkara nikah, takak dan rujuk.

Tiga sifat itulah yang menjadi punca yang mustahak memilih seorang kadi yang berkelayakkan. Dengan tiga sifat itulah kadi-kadi pada zaman Saidina ‘Umar menjalankan hukum-hukum Islam dengan sempurna, adil, dan rakyat merasa berpuas hati.

(Pati buah kalam “al-Khaṭāṭ” dalam “al-Lisān”).

Kearah Iktisad yang Dikehendaki Islam

Sambungan dari muka 22

nyata, lalu ia akan terangkan kepada kamu apa yang kamu sudah kerjakan.”

Siasah Iktisad

-Nyatalah bahawa kerja-kerja kita manusialah yang mesti menjadi dasar pokok siasah iktisad. Jadi bukanlah soal hak milikkekayaan sebagaimana dasar kapitalism dan komunilism, tetapi kerja-kerja kita manusia yang semestinya menjadi pokok pertimbangan.

Cara-cara menjalankan siasah iktisad Islam itu ialah sebagaimana yang pernah dianjurkan oleh Doktor Mohamad Hatta kepada pemerintah Indonesia, supaya pemerintah mendirikan “Pertubuhan Penjualan Pemerintah”. Doktor Hatta menegaskan supaya pemertintah Indonesia membuang siasah iktisad biasa, yang kacau sekarang; dan mencadangkan supaya “ekonomi terpimpin” seperti itulah yang mesti dijalankan oleh pemerintah. Bukan “demokrasi terpimpin”.

Saya percaya, sekiranya dasar siasah iktisad Islam ini dijalankan maka kita akan terlepas dari bencana iktisad yang sekarang telah menyakitkan perut dan memusingkan kepala. Bahkan penyakit makan suap dan kerosakan akhlak akan hilang lenyap.

(Demikian buah fikiran Doktor Haji Kaharudin Yunus yang dikemukannya dalam muktamar ulama seluruh Indonesia yang telah bersidang di Palembang baharu-baharu ini).